



Salmu 14 (15)

Uluk, iha Babilonia ka Ejiptu, besik odamatan templu sira nian, amlulik sira hakerek saida mak ema fiar na'in tenke halo molok tama iha templu laran. Bainbain sira hakerek indikasaun ritúal: oinsá ema bele hatais, oinsá hamoos an molok tama, nst...

Iha Biblia bele hetan indikasaun ruma ba povu Israel kona-ba buat hirak ne'e, liuliu iha Livru Levitiku, maibé bainhira profeta sira hahú haklaken Maromak nia Futar Lia, povu komprende katak buat ne'ebé Maromak hakarak mak hamoos ema nia laran, la'ós preokupa ho hahalok "liur" nian.



Objetivu testu nian

Salmu ida-ne'e salmu sira ida ne'ebé kona loos liturjia. Maibé, la ko'alia kona-ba serimónia ida, maibé nia ko'alia, fali, kona-ba tenke oinsá moris morál no klamar nian husi ema fiar-na'in ne'ebé hakbesik daudaun ba Na'i nia kadunan no atu bá hala'o ritúal sira ninia fiar nian. Salmu ida ne'e fó indikasaun atu ema ida-idak bele halo ezame do konsiénsia se nia prontu atu ba hasoru Maromak ka lae.

Salmu 14 (15) sai hanesan dekálogu ne'ebé hatudu oinsá sei hala'o liturjia, hatudu ema nia hahalok di'ak no moris klamar nian liu fali ritu sira hamoos-an nian.



Leitura testu nian

Nu'udar Salmu, ita bele reza pasajen ida ne'e, maibé mós konsidera ninia objetivu "didatiku" (atu hanorin)

¹Salmu David nian.

NA'I, sé mak bele tuur hela iha ó-nia kadunan?

Sé mak bele moris hela iha ó-nia foho santu?

²Ema ne'ebé ninia moris la hatudu sala,

halo buat ne'ebé loos no hateten lia-loos ho neon ho laran tomak^a;

³ema ne'ebé niniaibun la bosok hasoru ema seluk^b,

la halo aat ba ninia maluk,

no mós la hahoro ema ida;

⁴ema ne'ebé hewai buat ne'ebé la di'ak,

maibé hadomi sira ne'ebé hamta'uk Na'i;

ema ne'ebé metin ba lia ne'ebé hakotu tiha,

maski hahorok-an;^c

⁵ema ne'ebé la fó ninia osan atu hatutan osan liután,

no mós la husik ema dada nia hasoru ema sala-laek.

Sé mak halo nune'e, ema ne'e sei metin ba nafatin^d.

24,3-6
Is 33,14-16
Ez 18,5-9

Lev 19,16-18

Esth 3,2

Ex 22,24
Ex 23,8

16,8; 30,7
2Pt 1,10

^a Ema traduz mós: "Ida ne'ebé iha hanoin onestu sira"

^b Bele mós traduz: "Ida ne'ebé la rona bainhira ema ida ko'alia aat kona-ba ninia maluk seluk".

^c Ema hakribiit buat hotu ne'ebé Maromak rasik hakribiit.

^d Buat ne'ebé Maromak promete ba ema loos sira vale ba moris ida ne'e no ba moris rohan laek: Maromak sei hametin sira



Pontu ruma ne'ebé ita aprende husi salmu ida ne'e:

- Buat ne'ebé salmu ida ne'e hatudu ba hebreu sira katak la'ós hahalok kultuál mak importante, maibé atitude sira moris loron-loron nian.
- Dala barak ita hanoín katak bele hasoru Maromak iha fatin « sagradu » (lulik) de'it, maibé hodi rona buat ne'ebé Maromak husu ita haree katak nia haruka atu hasoru nia iha relasaun ho ema seluk no dever ne'ebé ita iha, hasoru ema seluk.
- Salmu fó hanoín katak la bele haketak ita-nia fiar, ho buat ne'ebé ita selebra iha Uma Kreda laran, husi ita-nia moris, ka husi buat ne'ebé ita hili loron-loron. Vida paralela (reza/dehan buat ruma no halo buat seluk) la kompativel ho ema fiar na'in.
- Bainhira ita temi liafuan « morál » ita hanoín kedas ba buat ruma ne'ebé hamenus ita-nia possibilidade moris nian no fó limitasaun ba ita-nia hilin. Ita bele komprende katak buat ne'ebé salmu propoin mak buat ruma ne'ebé halo ema sai « umanu » liután. Tan ne'e bele propoin salmu ida ne'e mós ba sira ne'ebé seidauk sarani ka seidauk hatene didi'ak Maromak.
- Dala barak, bainhira dehan « morál » ita hanoín ba seksualidade: salmu ida ne'e husu mai ita atu fó atensaun ba ita-nia nanal no ba osan; aspetu rua ne'e bele dada ema dook husi Maromak hodi estraga ema ne'ebé nu'udar Maromak nia ilas.